



Fasnacht 2018

Vereinigte Kleinbasler 1884
Alti Garde

Droone Bloog

Kunnt wirgglig alles Guet vo Oobe?
Die Ussaag het sich stargg verschoobe,
denn s surrt und lärmt und stöört aim seer
am Himmel herrscht e sau Verkeer.
Für d Vögel isch es kai Vergniege,
die hänn jo kuum e Platz zem fliege.
Derbyy isch doch die Vogelhorde
für d Mentschhait frieh zem Vorbild worde.
Well fliege schööni Gfüül kreierte,
hänn s d Mentsche sälber usbrobiert.
Der erscht Versuech vom Ikarus
ändet mit me Flopp am Schluss.
E Hai het sich am Sturz no gfreut,
doch d Flügel het är uuse gspeut.
Die näggscht Erfindig sinn Balöön,
wo nur mit Luft in d Höchi göön.
Me waiss syt denn: isch d Luft mol duss,
gits maischtens nur Verdruss am Schluss.
Wurd der Herr Wessels das verstoo,
hät är sy Boschte lengscht verloo.
Är schwäbbt, so isch es glaub z erglääre,
wien e Baloon in höchre Sphääre.
Doch zrugg zur Fliegerey und Gschicht,
denn die bikunnt syt denn mee Gwicht,
wo me die erschte Fluugi baut
und sich in grössri Höchi draut.
Motore gits und au Brobäller,
die mache jetzt die Fluugi schnäller.
E Vogel und e Fluugi glaite
durch d Luft und hänn vyl Gmainsaamkaite.
Nur kasch, es bringt aim us de Fuege,
bim Vogel halt nit uuse luege.
Vo all de vyyle Flugprojäggt
gits ganz e Huffe Flugobjäggt.
Glaini, grossi, diggi, schnälli
für zyvyli Zwägg und sälli,
wo s Militär erfunde het,
das sin denn maischtens Düsejet
und denne gits sogar e baar,
die fliege wirgglig nur solaar.
E riise Wunsch wird denn erfüllt,
wo soone Flügel obe drüllt.
Helikopter heisst das Gfäart
und isch e Fortschritt uf em Mäart.
Uss där Idee ischs nümme wyt
zue Droone in der neuschte Zyt.
Kuum isch das fliegend Ai geboore,
so fliege si aim scho um d Oore.
Si surre ständig ummenand,
verfolge aim, es isch e Schand,
mit Kameras wo alles seen
und allne uff e Wegger geen.
Mänggmool gheye si au aabe,
druss entstoot e grosse Schaade.
Und keyt dir aini uffe Kopf,
guet Nacht am säggsi, arme Dropf.
Unsre Waggis isch s bassiert,
drum sin si au so maltrahiert.
Schwäär gschädigt wird der Cortège gloffe,
sinn alli vo so Droone droffe.
Drum schreye mir au, wenn s no goot,
verbietet Droone s isch nit z spoot.
Als erschti Maassnaam, nunde Faane,
muess jetzt e Droone Flugschynn aane.
Zem Glügg gits denne au no Sache,
wo Droone wirgglig Sinn dien mache.
Wenn Buure iiri Fälder briefe
ob sich ächt jungi Ree verschliefe.
Oder wenn me in de Bärge
Felsturz tscheggt wo sich verbärge.
Vor Bolizey, die Zeedel-Lyysy
brucht s wirgglig nümme, denn s isch easy,
wenn Droone in de Basler Gasse
Parksünder biesse und erfasse.
S git in de Bärge wytri Nutze,
wie me Droone ka benutze.
Het d Kueh kai Muni wo si paggt
kunnt Droone zum Besoomigsaggt
S wird bald kai Härdehund me gää,
denn Droone dien das übernäa.
Und mit em Lumpi, isch s nit grass,
goot bald e Droone schnäll uf d Gass.
Denn gits no Droone, jetzt muesch loose,
die sammle bi uns uff de Strosse
vo all de vyyle Daggeli
am Schluss no iiri Gaggeli.
Uffgläärig bringt e wytre Nutze,
wo me e Droone ka benutze.
Der Hansli leert zerscht Theorie
und isch den vorne life derbyy,
wenn d Droone us der Nochberschaft
zeigt wie me Buscheli erschafft.
Me seet, s git ganz vyl Möglichkaite,
Droone z bruuche und z verbraite.
Zem Byspiil au im Grosse Root
könnt Droone hälfe in der Noot.
Au si macht Lärm und produziert
vyl Wind wo niene aane fiert.
Au d Energie duet nit wyt länge,
drum könnte Droone d Rööot verdränge.
Au zem d Regierig unterstütze,
kennte gscheyti Droone nütze.
Me sott so super Droone baue,
wo Politiker aini haue,
falls sii wie Trump und Kim Jong wäärde
und so die ganzi Mentschhait gfäärde.
Doch well s so Droone noonig git,
hätte mir e grossi Bitt,
dient uns bitte ganz verschoone
vor me Himmel voll mit Droone.

D Ladäärnen-Uusstellig uff em Minschterplatz und d Waagen- und d Reggwisnyten-Uusstellig bi dr Kasäärne sin vom Määntig znacht bis am Mittwuch demorge. Deert und an de 3 Verkaufsständ in dr Stadt ka men au alli Zeedel und Schnitzelbängg, d Blaggedde und dr Rädäbäng kaufe.

D Zeedel-Läasede isch am Sunntig no dr Fasnacht, vom Fimfi bis am Siibeni zoobe in dr Baseldytsche Bihni im Lohnhof. Dr Yydritt isch ver-gäbe.

Buebe und Maitli kenne ab em 7. Altersjohr in dr Pfyffer – und Drummel-schuel vo dr VKB gratis e halb Johr go schnubbere.

Yschryybe kasch di im VKB-Käller an dr Clarastrooss 57, im 2. UG am Määntig, 26. Hornig 2018 vom Säggsi bis am Achti zoobe.

Meh Informazioone läase und Aamäldige abschigge ka men unter:

www.vkb.ch bzw. jungi@vkb.ch